

4. KANUKOKA-p siunissami suliassai

Immikkoortoq 1-imi oqaluttuarisaanermut tunngasumi soorlu taaneqartoq, kommunit kattunerannut atatillugu kattuffik oqallisaaqqilersimavoq. Tamatumani apeqputinnaarinearpoq ”taava kattuffeqarnissaq pisariaqartuassava?”, taamaassappallu ”qanoq ittumik?”

Oqallinnermi illua'tungaaticut allaat ”kattuffiup atorunnaartariaqarneranik” oqartoqartarpoq illua'tungaaticullu ”KANUKOKA-p ataqatigiissaarisutut nukittuumik atuuttuarnissaa” aamma taannarineqarluni.

Taannali nukittuumik kattuffeqartuarnissamik oqartarnek aallartitat ataatsimiinnerini kingul-lerni siulersuisullu oqallittarnerini malunnaateqarneruvoq. Kisiannili tamatumaa qanoq ilusi-limmik pinissaa nukiillu qanoq annertutigisut tamatumunnga atorneqarnissaat apeqputaavoq suli erseqqissumik aalajangiivigineqanngitsoq. Aammami siulersuisuni apeqputaatinneqarpoq missingersuusiortarnikkut suleqatigiinnissamik kommunit aamma Namminersorlutik Oqar-tussat isumaqatigiissutaata kingornaticut suliassat nammagassallu agguataarneqarnerat qanoq iliumaarnersoq.

Kisianni atorfillit politikerillu qulequttamat ”KANUKOKA-p siunissami suliassai”-nut tunngatillugu aamma qanoq oqartarsimappat?

Suleqatigiissitat kommunaldirektørinik KANUKOKA-llu pisortaanik inuttaqartut 2010-mi ukiakkut allattuisimapput kattuffiup allattoqarfiata nakkutigisassaanik pingaarnernik arfineq-marlunnik:

1. Suliassaqarfinnik Namminersorlutik Oqartussanit kommuninut nussuineq
2. Ataatsimoortumik tapiissutit isumaqatigiinniutigineqartarnerat
3. Sulisut atugarisaat pillugit isumaqatigiinniartarnerit
4. Tusarniaasarnerni pissutsit pitsanngorsarneqarnissaat
5. Kommunini sulisut politikerillu ilinniartitaanerit pikkorissarneqartarnerallu
6. Ataqatigiissaarinikkut isumagisassat, soorlu suliassaqarfinni aqutsisut pisortallu ataatsimiittarnerini
7. Kisitsisitigut najoqqutassanik paasissutissanillu suliqartarnissaq

Pingaarnersiorlugit allattukkat taakku arfineq-marluusut kattuffimmi ukkatarineqangaatsiareeraluarput. Kisiannili tassa allaffissornikkut ingerlatsisut tungaannit isumaqartoqarpoq suli-assaqarfiit taakku kommunit suleqatigiiffiatigoortumik pingaartillugit isumagineqarallartariaqartut.

Politikerit tungaannit ukiut kingulliit sisamat ingerlaneranni KANUKOKA-p siunissami isumagisassaanut qulequttatut taaneqartartut pingaartumik makkuupput, siulersuisut ataatsimiinneri tusartinneqartartut:

1. Kattuffiup aqqissuussaanikkut iluarsartuunneqarnissaa aningaasaticut atorluanerulernissamik kinguneqartumik
2. Kommunini ineriartortitsinikkut suliassat pingaarnertinneqarnissaat, ingerlatsinikkut suliassat pingaarnertinnagit – ”nutarsaanissaq”, innovation, siunertariuarlugu
3. KANUKOKA-p suliniutini assigiinngitsuni kommuninut ilitsersuisutut ikiortitullu (facilitatorit) atuuttariaqarpoq

4. Pikkorissartitsisarneq siuarsaqqittariaqarpoq – sapinngisamik aningaasatigut imminut napatittussanngorlugu immikkullu naatsorsuuteqartillugu
5. KANUKOKA kommunit akunnerminni isumaqatigiissutigisinnaasaat tunngavigalugit ingerlatsissaaq, immikkut soqutigisaqatigiiffittut pinnani

Tassa naatumik oqaaserineqarsimasut eqikkarlugit oqassagaanni kissaatigineqartoq tassavoq: KANUKOKA nukittunerusoq, suliassaqarfinni pingaernerutitani taaneqartuni ineriartortitsinissaaq ukkatarinerullugu aningaasartuutit minnerpaaffissaanniitillugit ingerlatsisoq.

Qulaani allassimasut tassaapput 2014-imi marsip aallartilaarnerani KANUKOKA-mi siunnersortit marluk Kommuneqarfik Sermersuumi kommunalbestyrelsip Nuummi Katuami isumasioqatigiinnerani saqqummiussinnermini najoqqutaasa ilaat.

Isumaliutit saqqummiussami qulaani issuarneqartumi malersoqqikkumallugit juunimi 2014 kattuffimmi sulisut isumasioqatigiissinneqarput, tassanilu KANUKOKA-p suliassaqarfimminik ingerlatsinerata aaqqissuuteqqinneqarnissaanut siunnersuusiorneq aallartinneqarpoq. Qaammatini tulluuttuni suliaq nanginneqarpoq suleqatigiikkuutaarluni itisilerinermik, kommunit suleqatigiinnerata ilusaa imarisaalu kiisalu KANUKOKA-p suliassanik ingerlatsinera pillugit.

Tamanna pivoq ukiuni kingullerni siulersuisuni kissaatigineqartarsimasooq erseqqinnerusumik malittareqqikkumallugu, tassa KANUKOKA aaqqissuuteqqinneqassasoq kommunit aaqqissuussaanerannut nutaamut pisortallu suliassaqarfiisa aaqqissuuteqqinneqarneratigut suliassanut nutaanut naleqqussarlugu.

Siunnersuusaaq pillugu maannangaaq oqaatigineqarsinnaavoq tassani ilaatigut kommunit akornanni suleqatigiinnikkut isumagisassat ilaatigullu suleqatigiinnerup tunngavigisaata kattuffeqarnerup ilusaa qaqileriffigineqarmata – taakku tamaasa kommunit nutaat politikikkut allaffissornikkullu aaqqissuussaanerannut tamatumani siunertarineqartunut naleqqiullugit.

Sulisut missiliuusiat ataatsimut allanneqaleruttorput. Novembarip ingerlanerani siunnersuutit kommunaldirektørinut oqaluuseritinneqassamaarput. Tamatumalu kingorna KANUKOKA-p siulersuisuinut saqqummiunneqarumaarpoq, taakkunangaanniit kommunalbestyrelsinut kattuffimmullu aallartitanut akuerisassatut ingerlateqqinneqarnissaa siunertarlugu.